



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

### **De Confessionibus Ritè ac fructuosè excipiendis Doctrinas tam generales, quàm speciales ad varios Hominum Status accomodatas complectens**

**Lohner, Tobias**

**Dilingæ, 1679**

Cap. XII. Quid in Confessione Mutorum & Surdorum observare debeat  
Confessarius.

[urn:nbn:de:hbz:466:1-49251](https://nbn-resolving.org/urn:nbn:de:hbz:466:1-49251)

poterat, DEUS utique ex sua parte nihil deesse patietur, sed ipsum suâ gratiâ & præsidio contra omnia pericula, quæ ex talibus confessionibus ei creati possunt, fortiter defendet.

## CAPUT XII.

**QUID IN CONFessione MUTORUM ET  
Surdorum observare debeat Confessarius.**

**Q. 1.** *AN Confessarius, si ratione Officii Pastoralis aut alterius tituli incumbat illi cura eiusmodi Personarum, debeat efficere, ut suo tempore confessionis Sacramentum peragant? Resp.* affirmative juxta communem Doctorum sententiam apud Dianam p. 5. tr. 6. re. 3. cum enim per nutus & signa confiteri possint, non apparet sufficiens causa, eosdem à communi præcepto confessionis eximendi.

**Qu. 2.** *AN si Penitens mutus sciat scribere, monendus sit, ut per scripturam id faciat? Resp.* ita quidem sentire communem sententiam, teste Busenbaum l. 6. tr. 4. c. 1. dub. 3. a. 2. Verum quia contrariam sententiam etiam probabiliter defendunt Navarr. Barbosa, Valentia, Naldus, Ledesma, Victoria, Sotus & alii, ideo per modum consilij potius, quàm præcepti monendum putarem, ut scripto confiteretur.

**Qu. 3.** *AN, & quomodo eiusmodi Penitentes examinare debeat? Resp. 1.* Si tantum muti sint, ducendos esse in locum separatum, & nisi scripto confiteri possint, ac velint, monendos, ut ad quæstiones propositas nutu vel renutu capitis respondeant. **Resp. 2.** Si tantum surdi sint, ad similem locum ducendos esse, & signum dandum, ut sectant genua, & peccata sua narrare incipiant, quorum si aliqua quocunque modo narraverint, poterit illis signum dare percutiendo pectus & oculos in cælum elevando, quo inquirat, num doleant de peccatis propter DEUM offensum, & tunc si simile signum vicissim & ipsi dederint, absolutionem impertiri, penitentiamque globulis Rosarij, aut digitis designare. Quod si legere nõssent, possent quæstiones necessariæ scripto à Confessario proponi, & penitentia eodem modo præscribi. **Resp. 3.** Si Penitens simul mutus & surdus sit, & ab aliis adducatur, studeat ante confessionem ab his edoceri, quomodo cum illis nutibus agere debeat, ut vim Sacramenti percipiat aliquo modo



modo, & aliqua peccata, quantum potest, signis declaret. Postea in locum separatum ducat, atque iisdem signis ac nutibus eum examinans, si unum, alterumve peccatum probabiliter intellexerit, ac doloris signum acceperit, sine scrupulo absolvat, cum in tali casu non requiratur confessio materialiter integra, sed formalis integritas sufficiat.

Qu. 4. *An, si eo tempore, quo obligat preceptum Confessionis & Communionis, non possit ex signis à surdo & muto datis certum peccatum cognoscere, eum nihilominus absolvere possit?* R. affirmativè Fernandez apud & cum Diana p. 3. tr. 5. re. 3. cum sufficiat, talem penitentem accessisse eo animo, ut se accuset de peccatis.

Qu. 5. *An eius modi mutus & surdus à natiuitate etiam ad Communionem, non solum in articulo mortis, sed etiam tempore Paschali, aut aliis in Festivitatibus ad Confessionem & Communionem admitti debeat?* Resp. Diana l. c. r. 7. probabiliter affirmativè contra Marchantium, & hanc suam sententiam aliquot argumentis probat. Alij tamen communiter prudentiæ Confessarii hoc iudicium relinquendum censent; certè tempore Jubilæi aut Festivitatibus, cum plenaria indulgentia conceditur, non videntur repellendi, si petant, inquit Georgius Teretius in Instruct. Idiot. c. 1. §. 3. f. 70.

Qu. 6. *Quid agendum cum eo, qui à Natiuitate cæcus, mutus, & surdus existit?* Resp. paulò antè citatus Author; talem præter Sacramentum Baptismi non posse ullum aliud Sacramentum recipere.

Qu. 7. *Quid agendum sit cum agro, qui sanus frequenter confessus fuerat, & communicarat, per morbum autem vel senium cæcus, surdus & mutus effectus est, & in articulum mortis incidit?* R. Teretius l. c. si adhuc apparet compos mentis esse, ita cum ipso procedendum, ut primò per signa ad Confessionem aliquibus nutibus faciendam adducatur, v. g. ipsius manu propria signum crucis in ipsius pectore faciendo, pectus eius percutiendo, manusque ipsius sursum iungendo. Ut autem Sacerdotem agnoscat, admovendam esse ipsius manum ad vestem Sacerdotalem, aut Superpelliceum & Stolum, ac de percipienda Eucharistia per circulum in ore ipsius factum edocendum. Quòd si verò hæc nihil prodesse adverterit, extrema unctio-



unctione, si quidem more Christiano vixerit, muniendum videri.

*Qu. 8. Qualis penitentia eiusmodi Personis imponi debeat?*

*Res. 1.* si legere nōrint, posse illis scripto imponi talē penitentiam, qualis aliis ejusdem conditionis Penitentibus præscribi solet. *Resp. 2.* Si non sciant, aut ob cæcitatem non possint legere, tum per Rosarij granā, aut digitorum numerum quantitas penitentia, seu numerus Dominicarum Orationum & Angelicarum Salutationum præscribi potest. *Resp. 3.* Si à natiuitate muti & surdi fuerint, ideòque nullam orationem nōsse credantur, tunc saltem Confessarius signum crucis formando, & pectus percutiendo ad dolorem excitare, & hæc ipsa opera pro penitentia imponere potest. cum juxta probabilem sententiam non requiratur ad satisfactionem Sacramentalem, ut ex intentione complendi Sacramentum peragatur.

### §. I.

#### Quid in Scrupulosorum Confessione sit observandum?

*Qu. 1. Quid sit Scrupulus?* *Resp.* Layman. l. 1. tr. 1. c. 6. eum nihil aliud esse, quàm imprudentem & irrationabilem motum, nullā vel admodum levi ratione subnixum. Vocatur autem scrupulus ob similitudinem cum lapillo parvo, qui scrupulus vocatur; ut enim hic calceo inclusus pedem excruciat ambulantis, sic hominum piorum conscientia inhaeret suspicio & anxietas de peccato commisso, eamque non modicè lanciat, lancinatque. Differt autem scrupulus ab erronea conscientia, quia hæc per iudicium falsum uni parti adhaeret, non item scrupulus, utpote qui inter duas partes contradictorias, velut inter sacrum & saxum constitutus gemit.

*Qu. 2. Quomodo Confessarius conscientias scrupulosas cognoscere queat?* *Resp.* ex sequentibus indiciis. 1. *Ex irrationabili formidine:* si videlicet quis seipsum interrogans, quæ sit causa anxietatis, nullum argumentum inueniat. Ita Bonnac. to. 2. d. 4. q. 4. pu. 8. 2. *Ex iudicio Confessarii, vel alterius viri docti,* qui iudicat aliquem esse scrupulosum. 3. *Ex modo confitendi:* si scilicet assidue hæsitando dubiè & perturbatè confiteatur. 4. *Ex modo orandi:* si videlicet anxie preca-